

Buki pa mucha “Yuwana biahero” di Olga Croeze, ta riba mercado cu sosten di UNOCA

ORANJESTAD - Un biaha mas Olga ta sinti su mes hopi contento di por ofrece comunidad su di dos buki di storia pa mucha, yama “Yuwana biahero”. Olga ta un escritora cu algun aña pasa a skirbi e buki “Purun di storia”. Ta remarcabel pa menciona cu Olga a nace na Uruguay y su idioma materno ta spaño y

esaki ta su di dos buki completamente den idioma papiamento. E “Purun di storia” tabata un compilacion di 10 diferente storia. El a inventa personanenan inanima na cual el a duna bida cu imaginacion. Igual na e prome, awor tambe e deseo di Olga no ta solamente pa recrea e mente di

mucha, si no tambe pa lanta su creatividad y poder di imaginacion. Y algo hopi importante ta cu e mucha por experiencia e mensahe positivo tras di e storia. E personahe principal di e buki nobo ta un yuwana, cu tabata anhela di sinti su mes realmente feliz, te ora cu el a haci un descubrimiento importante. Un biaha mas Olga



kier gradici UNOCA pa e apoyo cu nan a dun’e pa por logra e realisacion di e buki aki. Olga tambe kier a destaca e personanan cu a colabora cun’e, den e bunita proyecto aki, esta Sheila Werleman, Elvis Tromp y Ramon Todd, kendenan tur a pone nan granito di arena pa esaki.

Atrobe e deseo di e escritora ta cu e buki “Yuwana biahero” por ta na agrado di tur mucha y manera semper, e meta ta pa laga un siñansa positivo atras. E buki “Yuwana biahero” ta obtenibel na UNOCA pa 15 florin cu e meta pa fomenta lesamento sano bou muchanan. □